

欽定剿平粵匪方略

欽定剿平粵匪方略卷二百六十七 辛酉年

六月初一日 戊午 薛煥奏言平湖乍浦逆匪自被

我軍擊敗續有嘉興添來悍賊在平湖設卡以
圖再犯金山浙省督帶礮船之副將黃金友於
五月初一日督同府經歷黃立鼇等會合平湖
縣知縣汪元祥及華亭金山奉賢三縣紳士各
帶兵勇行至廣陳地方接仗獲勝初二初三等

日復將太平橋象皮橋周家圩等處逆巢剷除
淨盡初四日又將徐家埭林家埭賊卡平毀該
逆糾集兇黨仍至象皮橋等處屯聚初五日黃
金友派黃立鰲帶礮船繞出賊前令紳士盧道
昌等帶陸隊斷其後路汪元祥及紳士沈文照
等帶勇進剿黃金友督隊直抵象皮橋槍礮環
施斃匪無算該逆竄至魚潛港投入僞師帥馮

老寶逆巢黃金友等併力擊之生擒十四名擊斃二百餘名餘匪敗遁乘勝攻毀魚潛港賊卡其時署提臣曾秉忠派守備曾敏行何啟漢各帶礮船連檣而至當卽跟追至陳家田殺賊甚多我軍收隊駐紮廣陳初七日賊又分路來撲曾敏行等及各縣民團齊出當將半路廟柳港四里橋賊匪擊敗另股直撲廣陳最爲兇悍黃

金友身先迎敵斃賊一百數十名正酣戰聞各路敗匪忽由小路包抄愈聚愈多黃金友腹背受敵猝被槍傷左脇猶負痛指揮士卒將賊擊退方行收隊黃金友嘔血不止卽於是夜殞命我軍勢難仍紮廣陳經曾秉忠將黃金友原部水軍派守備黃淮英管帶陸隊派守備滕長林管帶會同曾敏行等駐紮三官堂聯絡堵禦初

九日賊由廣陳竄至明珠庵曾敏行等揮令各船開礮斃賊甚多擊沈賊船二十餘隻賊猶拚死相持曾秉忠親督水陸各隊趕到奮勇截擊賊始奔逃適金山縣知縣周紹濂約會都司龔得貴同時馳至隨同追剿賊即退至廣陳初十日曾敏行等復駛礮船追抵平湖城下轟擊多時賊伏不出我軍收隊回防曾秉忠仍駐洙涇

當黃金友出勦廣陳時副將滕嗣林料乍浦之賊必將乘機出竄卽與已革總兵米興朝加意嚴防初七日該逆四五千人果分兩路來撲一由平湖之全公亭進偪金山衛一由海塘直撲王家衙滕嗣林派都司楊安明遊擊田宗興等分路衝擊殺賊多名該逆敗退我軍跟追十餘里探聞獨山之賊分股已至新倉滕嗣林恐其

抄襲後路卽收隊回營田宗興楊安明等於初
八初十等日進攻全公亭斃匪多名該逆遁回
乍浦惟米興朝一軍現經杭州將軍瑞昌浙江
巡撫王有齡檄調回浙當此防勦喫緊亟應另
派兵勇填紮原營臣已調駐防諸翟鎮之參將
梁安邦帶勇一千餘名前赴金山衛城而以臣
標兵丁五百名調赴諸翟協同防禦查逆匪盤

踞平湖乍浦兩城與嘉興嘉善海鹽等處聯成
一片意在撲犯金山圖竄浦東完善之地此次
雖經擊退難保不糾衆復來 臣惟有督率諸軍
嚴防侵犯俟有機會可乘卽當迅圖克復總兵
銜補用副將黃金友本係張國樑部下得力之
將歷在皖浙各營身經百戰勞績甚多茲因力
戰捐軀深堪憫惜仰懇

天恩飭部照總兵例從優議卹以慰忠魂奏入

上諭內閣曰逆匪於浙江平湖境內設卡圖犯金山副將黃金友督兵會合練勇進剿五月初二三四五等日擊賊於太平橋等處隨攻毀魚潛港賊卡初七日賊撲廣陳黃金友迎擊獲勝旋因敗匪包抄致被槍傷殞命賊衆隨竄明珠菴經署提督曾秉忠擊退其牛浦竄賊亦經已革總兵米興朝擊敗回巢總兵銜

補用副將黃金友屢立戰功茲以勦匪捐軀殊堪憫
卹著照總兵例從優議卹以慰忠魂

薛煥又奏言四月二十一日嘉興逆首狼天義
廖天福等率黨萬餘與久踞浙境西塘之逆首
郅天福會合另有大股分踞俞匯欲圖竄撲蘇
境章練塘以窺洙涇署提臣曾秉忠派守備林
隆祥等督帶戰船迎擊曾秉忠親督各軍接應

先將白虎頭地方賊營兩座攻破奪獲賊船三十餘隻復將金澤鎮賊巢洗盡斃賊二百餘名燒燬賊卡數處乘勝直抵西塘分軍三路進剿並飭幹勇潛入鎮內拋擲火彈焚燒賊館逆衆潰敗正追殺間又見後路賊船數百號來援我軍轟沈賊船數隻追至俞匯諸軍奮勇剿擊賊衆四散奔逃遂將俞匯鎮賊館賊卡概行燒燬

時已夜深卽收隊回泊章練塘是日各路斃賊不下二千餘名生擒數百名二十二日該逆回竄俞匯復經曾秉忠督軍擊敗仍遁入嘉善各城曾秉忠隨飭諸軍分駐要隘並令署參將李恆嵩分隊移紮北蕘山鳳凰山等處李恆嵩知北蕘山爲青浦賊匪出入要隘我軍進紮該逆必來衝撲因密派都司劉秉忠由泗涇抄至北

斡山之前分路設伏賊果大股衝至李恆嵩揮
軍迎敵伏兵復從旁截擊該逆傷斃無算我軍
追殺數里一而搶築營壘六座並調礮船分泊
北斡山前後以壯聲威此次水營將士越境剿
賊埽平逆巢實爲奮勇出力可否由 臣查明勞
績歸入肅清金山縣境案內請獎之處出自

恩施陣亡弁勇容俟查明彙案請卹奏入

上諭內閣曰浙江嘉興逆首狼天義等與西塘鎮逆匪
鄧天福糾黨圖撲章練塘窺伺洙涇經署提督曾秉

忠派守備林隆祥等督帶戰船攻破白虎頭等處賊
營並將西塘鎮及俞匯賊館賊卡一律燒燬其青浦
之賊來撲北簞山官軍營盤署參將李恆嵩設伏擊
剿斃匪無算仍著曾秉忠激勵將士乘勝進攻毋留
遺孽此次水營將弁越境剿賊以少勝多所有出力

員弁兵練著薛煥查明彙入肅清金山案內一併覈實保奏陣亡弁勇並著查明分別辦理

初三日庚申曾國藩胡林翼奏言逆首陳玉城率

黨回援安慶候選道曾國荃憑濠固守賊不敢
偪茲據總兵鮑超副將成大吉呈稱四月十一
日鮑超率中營副將陳山立等攻其頭壘左營
參將王衍慶等攻其二壘右營副將陳得勝等

攻其三壘前營副將黃慶等攻其四壘成大吉
自率貞右等營列隊於集賢關中路以防關內
之賊派武前營都司曾昭仕等搜剿集賢關以
東武中營參將胡以章等搜剿集賢關以西其
關內十三壘經曾國荃作長濠圍之該總兵等
遂得專意圖攻四壘詎料壘中皆係多年悍賊
官軍窺若無人一近壘邊則槍礮如雨我軍奮

怒四面猛撲多被槍礮傷亡迄不能前時水師
提督楊載福飭水師助攻亦有傷亡知州周開
錫與該總兵等籌商環濠修築礮臺數十座傳
令各兵勇晝夜環攻誓不使一名漏網二十九
日我軍用大礮將賊壘轟倒數丈賊勢頓沮然
猶踞壘不出五月初一日鮑超成大吉派各隊
四面圍定又命吳亮才入壘傳呼飭令脅從棄

械來歸於是出降者數百人該逆自知萬無生理因皆乞降該總兵等令兵勇以次入壘悉數生擒惟劉瑄林踞第一壘仍然抗拒查點名數三壘之賊除先降之短髮賊三百餘名釋放外其長髮老賊共二千八百餘名悉行正法其中有僞屈天豫賈花富僞傅天安李仕幅僞垂天義朱孔堂首逆三名僞檢點將軍丞相指揮以

下共一百八十五名初二日成大吉奉調拔營
回援鄂省鮑超仍圍攻劉璿林之壘該逆於是
夜三更後棄壘分逃鮑超卽率馬步追殺至馬
踏石溪河泛漲賊不能渡當經鮑超督率副將
陳由立等將全股六百餘名悉數生擒其分竄
之股沿河而下意欲覓船偷渡水師右營營官
彭楚漢副右營營官趙三元率勇兇剿適有民

船一隻該逆二百餘人棄馬登舟哨官顏海仙
飛檣趕到一併生擒正法其逆首劉瑄林就近
解赴提臣楊載福大營訊明支解並傳首安慶
城外呼城賊壘賊而告之以寒逆膽而快人心
又據楊載福鮑超成大吉咨呈劉瑄林李仕幅
賈荏富等逆供詞均稱逆首劉瑄林自安徽渡
江充作先鋒破我金陵圍師營壘數十座連陷

蘇常等郡邑皆係該逆爲首肆惡等因查粵逆
自滋擾以來雖屢經挫敗然臨陣率新擄之衆
以當前敵我軍所斬長髮老賊至多不過數百
名此次陳逆乘夜潛遁留四壘於集賢關外原
欲牽掣我師且壘中係其平日第一枝悍黨希
冀憑堅久拒以便糾黨復來用解安慶之圍不
料陳逆自破多隆阿敗於掛車河四壘之賊孤

守二十餘日援絕勢窮無計可脫鮑超成大吉
等晝夜環攻仰賴

皇上天威將士用命殲除長髮老賊至四千餘名之多
實爲從來所未有厥功甚偉所有尤爲出力之
守備吳亮才等相應先行開列願懇

恩施其餘出力員弁可否容臣等擇尤保奏陣亡之總
兵銜副將蘇文彪等均請

飭部從優議卹以慰忠魂奏入

上諭內閣曰此次總兵鮑超等環攻賊壘殲除長髮老賊四千餘名洵足寒逆膽而快人心所有在事尤爲出力之守備吳亮才著免補都司以遊擊儘先補用並賞換花翎補用知州周開錫著免補知州仍留湖北以知府儘先補用並賞戴花翎副將余大勝著以總兵記名簡放顏紹榮著賞加總兵銜並賞給標勇

巴圖魯名號參將王衍慶著以副將儘先補用並賞
給猛勇巴圖魯名號李文益著以副將儘先卽補協
領明興著賞加副都統銜知縣伍華瀚著以直隸州
知州不論雙單月遇缺卽選儘先參將會昭仕著免
補參將以副將儘先補用守備蕭玉元著以都司儘
先補用並賞加遊擊銜其餘出力員弁著曾國藩胡
林翼查明保奏陣亡之總兵銜副將蘇文彪遊擊銜

都司何宗耀千總祝士相把總龔春山都司陳仁壽
彭萬春守備戴連山劉萬榮千總蔣鳳祥文先丙葉
介藩謝日昇戴爾昌胡以文朱堯階把總周盛殷唐
興元唐玉元陳上如田慶連易澤明外委謝得勝馬
鵬程劉萬友李明富張必勝守備劉永嚴把總戴玉
春外委熊致祥從九品銜王春蘭千總鍾富庭外委
龔照華均著交部從優議卹

同日慶端奏言汀郡克復後連城上杭所轄均無賊蹤惟廣東尚有賊匪出沒江浙兩省大股肆擾飄忽異常閩省汀州建甯邵武各郡與江粵浙江三省比鄰仍應嚴密防堵現將總兵曾玉明等所統兵勇一千八百餘名代理汀州府知府張銓慶所統兵勇一千五百餘名遊擊楊三益之勇二百名全數留汀分紮要隘以堵賊

由瑞金回竄之路又飭署汀州中營遊擊許忠
標挑留壯勇四百名扼紮武平以防粵寇窺伺
鄱司黃大雄等帶勇一千一百六十名嚴防甯
化就近策應邵武並責成邵武府知府周揆源
等分投守禦以杜該逆竄越之路建甯府屬之
崇安各關本有海壇兵三百名駐守又飭建甯
鎮府添撥兵勇前往協防竄踞江山之逆旋探

閩由清湖紮至峽口與仙霞關均有閒道可通
冀圖擾我邊疆當調守備盧成金等軍往防該
逆分股由處州府屬之龍泉遂昌轉竄查龍遂
接壤松溪政和難保不繞路潛越復調參將蔡
潤澤等分投防堵第臣此次督兵抵延所需餉
糈多方羅掘幸而歲功迅速不得不先行酌撤
以節糜費茲將遊擊戴慶已革遊擊葉榮元副

將惠壽所帶兵勇一併撤回歸伍遣散其龍巖
防軍現亦分別裁留臣於五月初四日隨帶省
標兵四百名回省至浙省江常二縣尙未克復
衢州軍情緊要業調候補道張啟煊督率所部
由永安前赴浦城將盧成金兵勇併歸統帶進
攻江山以解衢郡之危仍令劉紹基所部漳兵
分守二渡岑陽各關並飭黃大雄等俟甯化邵

武邊防稍鬆兼程赴浦由張啟煊統帶援浙奏
入報

初八日

乙丑

官文胡林翼李續宜奏言皖逆陳玉

城圖解安慶城圍上竄德安隨州等處三月初

旬臣官文派道員劉嶽昭所部勇丁千六百人

馳往隨州攻剿兼保安襄門戶臣李續宜派道

員金國琛會率各營同副都統舒保馬隊副將
張啟基等水師進攻德郡乃該逆負嵎固守於
郡城外周列木城密排礮石以阻我師金國琛
商令副將趙太和等於東南西三面逼城而壘
三月二十三等日我軍於城外鳳凰山南壇
山等處築成礮臺晝夜轟擊該逆突由北門撲
出經我軍截勦斃悍賊三四百名餘逆敗退入

城四月初七日夜舒保金國琛密令馬隊伏於東嶽觀之坳以步隊爲接應又列隊於長濠之上防東北門之賊復於北門設伏以待初八日我軍以計誘之逆衆果揚旗出城金國琛等俟其離城較遠伏兵盡起扼其西北門出入之路蕭慶衍與舒保左右衝擊張啟基等亦率划船上轟逆衆蒼黃失措我軍縱橫截殺計斃賊六

七百名生擒正法一百五十餘名敗賊竄伏城
柵爲我軍轟斃與偪死河內者不可數計十一
日賊乘霧由北門潛出經馬步各軍截殺斃賊
又三四百名自此該逆不敢復出金國琛等因
令各營就壘中開挖地道功已過半一俟偪近
城根卽可設計進取其隨州踞逆與德安之賊
爲犄角守之愈堅劉嶽昭自進軍搥鼓墩後節

次偪攻皆爲礮石所阻四月初三日偵知賊於
南北兩路設伏而以西路排列賊陣往來誘敵
爲包抄我軍之計劉嶽昭遂令參將蕭品元等
出左路迎擊北路之賊參將李盛貴等出右路
迎擊南路之賊都司劉正庭等迎擊中路之賊
劉嶽昭自率遊擊李用恆等爲策應甫經出隊
該逆卽悉銳來撲我軍奮勇直前槍斃賊目一

名悍賊十餘人逆黨抵死抗拒我軍三路圍剿
斃賊二百餘名該逆紛紛潰散我軍追至河岸
生擒溺斃者又數百名嗣復屢次進攻賊皆堅
守不出五月初五日忽出數千人麕聚西門濠
外添築土壘劉嶽昭率軍直抵濠邊截殺斃黃
衣騎賊四名步賊二百餘名餘賊奔竄入城現
飭各軍遏其奔逸絕其援應設法力攻迅圖克

復其下游黃州蘄廣踞逆並南岸竄匪亦經臣
等分派各軍次第剿辦以期剋日肅清奏入報

十六日癸酉李續宜奏言自四月閒潯口湖水漸

漲水師可以展布無須陸營扼駐臣於二十五

日移營五月初二日抵黃岡之新州駐紮圖復

黃郡嗣因江西逆匪竄擾南岸距鄂垣較近臣

開

又於初六日拔營渡江而南初八日駐軍離省
二十里之魯家港以固會垣重地當與督臣官
文撫臣胡林翼會商分調副將成大吉候選道
蔣凝學知府毛有銘等進剿興國大冶等處之
賊俟獲有勝仗再行會奏奏入報

十七日

甲戌

瑞昌王有齡奏言五月初閒有江西

股匪由江山地界竄至湖山村與遂昌逼近處
州府知府李希郊馳赴該縣募勇二千餘人分
布防守署溫處道志勳會商溫州鎮總兵調撥
兵勇定於初八日統帶前往處州扼紮旋據縉
雲縣知縣稟稱遂昌松陽有相繼失守之說李
希郊帶勇駐紮碧湖十五日賊匪竄到接仗失
利兵勇潰散十六日午刻遂竄入府城又據東

陽縣知縣稟稱武義之賊由宣平竄至永康聞
已於十八日失守此股賊匪係由處州而來各
等語祇緣金華蘭谿道途梗阻文報罕通該府
縣失事情形及文武各員下落並無確信溫處
道曾否帶兵到防亦未據稟報儻永康之賊果
來自處州則縉雲亦恐不保金處業已相連賊
不東竄溫台卽北竄甯紹完善之區勢將盡行

糜爛不得不力籌堵扼無如浙省兵勇正在攻
勦金蘭未遑兼顧而省城各隊又不能再行分
撥況庫儲早罄枵腹荷戈尤難用命臣等憤懣
之餘倍深焦灼除檄調道員蘇鏡蓉速帶台勇
馳赴東陽堵勦外因思處州毗連閩省援應較
速惟有咨商閩省卽撥勁旅迎頭痛勦以扼兇
鋒臣等接據衢州道府稟報福建汀州業經克

復餘匪竄往江西由建昌直達貴溪離廣信不遠是衢防又將喫緊查閩將中惟總兵曾玉明調度有方副將林文察驍勇無敵上次江常克復該二員之力居多今又攻克汀州實屬聲威卓著若得該總兵等裹糧來浙必能力保危疆相應請

旨飭下福建督撫臣速派曾玉明林文察督隊前來大

局幸甚

瑞昌王有齡又奏言欽奉

諭旨飭令候補總兵李定太幫辦徐宿勦匪事宜查徐
州府爲南北咽喉地關緊要自應卽飭該總兵
迅速前往惟現在浙江嘉興未復省城戒嚴處
金兩府又爲賊踞饒廷選張玉良堵勦金華蘭
谿壽昌之賊尙覺應接不遑處州勢難兼顧李

定太獨當衢州一面雖江常二縣現無賊蹤而
閩省汀州股匪已由建昌竄至貴溪河口一帶
駭駭又將入浙若再任其竄入腹地歸併處金
益有不可收拾之勢專賴李定太一軍力扼兇
鋒刻下情形非但浙省接手乏人亦恐不能臨
敵易將擬俟浙東軍務稍平再令該總兵繞道
前往奏入

上命軍機大臣傳諭瑞昌王有齡曰賊匪由衢屬紛竄
壘陷城池張玉良雖帶兵堵剿而逆氛日熾斷難望
其得力壘諭瑞昌等令饒廷選統帶官軍相機督剿
日久未據覆奏此時浙省軍務益形喫緊著仍遵前
旨令該提督統帶各路官軍以專責成並飛催曾玉
明等援兵合剿次第收復各城處州等城於賊匪竄
至時何以並未接仗卽致失守知府李希郊前往遂

昌募勇是否先期逃避署溫處道志勳統兵前赴處
州當該城失守時已否到防有無畏葸不進情事著
一併查叅嚴行懲辦以儆其餘徐宿勦匪事宜關繫
緊要仍著迅飭總兵李定太繞道前往徐州毋再延
緩其衢州防務著該將軍等另行派員經理

上
又命軍機大臣傳諭慶端瑞璜曰前因江山等城失
陷諭令慶端派兵赴援旋據該督奏稱派藩司林福

祥記名道張啟煊赴浙助剿茲據瑞昌等奏賊陷處
州等城軍情危急探聞汀州業已克復請調總兵曾
玉明等速行赴援等語賊匪由常山竄陷壽昌金華
蘭谿後處州遂昌松陽永康各府縣城池復行失守
賊勢實形猖獗甯紹溫台等屬處處堪虞慶端統轄
該省自應速籌援救昨據該督奏報汀州克復後卽
派曾玉明等帶兵屯紮以防賊由瑞金回竄惟浙省

危急萬分旣據瑞昌等奏曾玉明等上次克復江山
常山聲威頗著果使調往必能得力卽著慶端瑞璜
飭令總兵曾玉明副將林文察統帶兵勇剋日起程
馳赴浙江援剿毋許遲誤其林福祥一軍仍著飛催
前進並催張啟煊馳赴浦城將該處防兵一併統帶
進剿汀州府城應否另調兵勇駐紮著慶端等斟酌
辦理

上諭內閣曰江西股匪由江山縣竄至湖山村遂昌松陽相繼失守五月十六日該逆竄入處州府城武義之賊由宣平竄至永康該縣亦於十八日失守所有該府縣失事詳細情形及文武各員下落著瑞昌王有齡查明具奏如地方官有先期逃避情事卽嚴叅懲辦並著瑞昌等調派兵勇會合援兵迅速進剿務將失陷各城剋期收復毋稍遷延

瑞昌王有齡又奏言欽奉

諭旨飭臣等約會蘇師夾攻平湖乍浦以圖克復查平

湖乍浦海鹽各城至今尙爲賊踞臣等前調署

定海鎮總兵袁君榮赴乍攻勦雖疊獲勝仗祇

以陸路無兵接應日久未能得手而餘姚鎮海

處處設防守備張其光等礮船亦尙能扼賊偷

渡不至擾及完善之區其竄犯洑涇金山之賊

業經曾秉忠等擊退臣等屢准薛煥咨會未嘗
不思撥兵夾擊期復平乍各城無如衙嚴金處
各郡相繼告警省兵抽調已空竟無一旅之師
可撥不得已請

旨飭調米興朝回浙旋准薛煥來咨已另派兵勇填紮
金山衛米興朝於五月十六日由海道來杭臣
等卽令防堵乍浦先其所急現據探報十八日

有大股賊匪由嶼城激浦水陸竄犯袁鎮距海甯州城五十里石門亦添賊數千又據湖防局道員趙景賢稟稱二十二日突有宜興烏溪賊船一百數十隻糾合東山賊船兩路來攻夾浦我軍寡不敵衆被賊裹去礮船三隻都司江振聲軍功韓文魁水陸各營均接戰失利湖防情形危急各等語臣等復調遊擊陳永春礮船

由塘赴湖助剿浙東賊氛方熾浙西逆燄又張
兵餉兩窮大局幾不堪設想儻能仰邀

聖主如天之福得有轉機無論何路稍鬆卽當約會蘇
省官軍夾攻平湖海鹽乍浦先復數城以爲進
取嘉興之計斷不敢置爲後圖

瑞昌王有齡又奏言壽昌之賊竄過小番嶺直
達江口已與蘭谿之賊聲息相通張玉良一軍

雖屢挫賊鋒不免腹背受敵據探初八初九等
日賊由金華渡過南岸於官軍相近地方築壘
三座欲約壽昌之賊撲營初十日張玉良令副
將貴廷芳等進攻蘭城副將況文榜等進攻南
岸賊壘殺賊無算我軍乘勢直入三壘登時踏
毀貴廷芳等亦將蘭谿北門外賊壘攻破十一
日賊分數股撲犯劉萬德等前敵各營復經擊

退斃賊數百名十四日賊由諸葛村永昌鎮直
向河西奔竄蘭城之賊亦渡過西岸來撲張玉
良令況文榜及副將韓文貴等分投迎勦自督
親軍策應況文榜躍馬衝突各營復從後包抄
該逆蒼黃四散我軍追殺十餘里始行收隊十
六十七十八等日派隊進勦疊有斬獲至金華
之賊時在數十里外焚掠均卽退回新授處州

聞

鎮總兵文瑞自抵義烏後卽率隊馳赴孝順村
令遊擊曾得勝扼要進紮與余萬清所集民團
互相聯絡剋日攻城奏入均報

同日胡林翼奏言臣自去冬患病蒙

恩賞假一月在營調理迄未就痊此次由水路回鄂感
受暑熱欬逆愈甚嘔血日增精神極爲委頓合

無仰懇

天恩再行賞假兩箇月在署調理軍務重件臣仍與督

臣官文安徽撫臣李續宜會商辦理奏入

上諭內閣曰湖北巡撫胡林翼著再賞假兩箇月在署調理

胡林翼又奏言五月十二日臣自太湖啟行沿江西上六月初二日抵省先經督臣官文安徽

聞

撫臣李續宜會派副將何紹彩進剿咸蒲崇通
一路之賊派副將成大吉候選道蔣凝學進剿
興冶武昌一路之賊一俟南岸肅清再行合剿
北岸奏入報

十八日
乙亥巴棟阿馮子材奏言據如皋縣知縣

徐銀粟稱五月三十日南岸江陰常熟逆匪竄

至江心壽星沙焚掠勢將久踞逃出難民紛紛
北渡咸稱該逆製造木筏外駕槳船意欲竄擾
北岸請檄飭水師勦辦等情伏思長江數百里
南岸港汊紛歧防不勝防該逆現已乘隙突竄
江洲尙幸盤踞江心未登北岸亟宜速爲撲滅
當咨都興阿派撥陸軍就近馳往該處實力堵
禦以遏北竄一面飛咨黃彬迅撥師船駛赴下

游迎勦並調派防下游之江南蘇松鎮總兵周
希濂浙江定海鎮總兵李德麟遊擊郭定猷各
率師船會擊以期迅速藏功惟查大江南北形
勢裏下河一帶北達清淮爲南北兩軍餉源該
逆窺伺已非朝夕設竟偷渡長江使我腹地動
搖揚州之軍不固鎮防之勢益危是下游江防
萬不可疏荊州將軍都興阿遠在揚防浙江黃

嚴鎮總兵黃彬駐紮瓜口距江陰亦遠且有幫
辦北岸之責未能專顧下游臣等會商再四非
於水師中擇一智勇兼備大員爲之總統難期
力遏兇鋒查浙江溫州鎮總兵吳全美聲威久
著與黃彬同泊瓜口可以分身合無仰懇

天恩飭下吳全美總統鎮江至江陰一帶師船就近防
剿則上下游各有責成捍南卽以衛北誠於大

局裨益非淺奏入

上命軍機大臣傳諭都興阿黃彬曰逆匪盤踞壽星沙
意圖北渡下游江防倍形喫緊黃彬總統水師駐紮
瓜口距江陰較遠且有幫辦之責北岸亦須兼顧下
游水師總統無人恐事權不一堵剿未能得力著都
興阿黃彬卽飭總兵吳全美速赴下游總統鎮江至
江陰一帶師船就近防剿以專責成務將壽星沙賊

匪迅速殄除毋任久踞都興阿等亦當分飭水陸各軍嚴扼江岸以防逆匪北竄

同日王履謙奏言據報逆匪攻陷金華後分股旁竄一撲武義一擾蘭谿均於四月二十三日同時被陷刻下金華之賊已將附郭民房盡行燒燬蘭谿之賊日赴四鄉搶掠米糧搬運入城似有久踞之勢臣當函商撫臣王有齡催令援

兵加緊趨行以期迅圖克復詎副將文瑞統領
兵勇行抵諸暨縣城適值團總何文慶管帶練
丁調赴金華會勦亦於是日進城與官兵途遇
因口角起釁互相械鬪臣聞信益增焦灼又函
致撫臣迅速派員彈壓一面催令該副將剋日
拔隊起程該副將現已領兵前進分段紮營前
任雲南鶴麗鎮總兵余萬清亦集民團在孝順

街駐守聲勢尙稱聯絡至紹興府城環海枕山
徑路叢雜守禦較難現在下游海口須防乍浦
海鹽對渡之賊上游沿江須防蘭谿下竄之賊
諸暨嵊縣又須防金華陸路之賊逆氛四逼實
有面面受敵之虞臣與運司莊煥文籌商將撫
臣派赴紹興之礮船調赴外江停泊並囑翰林
院編修鍾寶華等嚴防蕭山沿江一帶其諸暨

嵯縣各路要隘各請前臬司段光清馳往布置
郡垣防守事宜已調餘姚練丁一千名歸員外
郎謝敬統帶沙勇一千名歸郎中施本國子監
學正楊鳳藻分帶擇要駐紮紹興爲浙東門戶
又係臣桑梓之邦惟有督率官紳力圖保衛不
敢稍涉疏虞奏入報

十九日

丙子

署湖南巡撫江蘇布政使毛鴻賓奏

言粵西匪黨意在由楚竄江疊次嚴飭各營力
遏該逆東竄之路該逆自竄界首後經粵西兵
練沿途截擊死傷甚衆旋即偷渡灌河參將江
忠朝等先派兵勇設伏河岸伺賊半渡突起擊
之槍斃百餘名賊衆折向江口竄走復被粵西
兵團扼截該逆遂就地築壘修濠負嵎抗拒江

忠朝等於五月十六日調派四營向灌陽進發
十八日各營會合粵師節節搜剿斃賊數千人
賊知兵勇四集無路可逃僞丞相余城義等率
黨分詣楚粵兩軍乞降臣已咨會永州鎮臣李
明惠等會同江忠朝妥慎辦理分起資遣回籍
至僞忠王李秀城由江西竄入鄂境連擾通城
蒲圻通山崇陽大冶興國各州縣曾國藩已調

總兵鮑超由九江進規瑞州胡林翼亦率總兵
成大吉回援南岸地廣賊衆兵力尙慮不敷查
候補道江忠義所部精捷營向稱得力該員病
勢就痊已飭星速赴營督帶所部來省或由瀏
陽橫趨義甯或由巴陵直赴通城視賊所向相
機勦辦提臣周寬世副將趙福元等軍亦卽分
道並進期埽逆氛奏入報

聞

二十日丑丁巴棟阿馮子材奏言據報洪逆在太

平關造成礮划數百隻業已下水欲由御河出

江下竄又賊在福山趕造戰船倣我長龍礮划

式據安排槍礮並金陵擄民貨船二百餘隻

約會撲犯鎮江江陰現有賊船數百號糾集大

股逆匪亦有出江北竄之信等語查大江以南

盡是賊蹤漢港紛歧有防不勝防之勢前經委員查看據稱鎮江以下南岸僅泊師船四十餘隻北岸計有九十餘號停泊各口竊思堵賊北竄必須厚集南防今鎮江自金山以達甘露寺江面遼闊僅有賴鎮海師船寥寥分布而上游黃彬吳全美陳國泰賴鎮海等所部師船均在北岸設賊船乘風下駛頃刻可抵鎮江北岸防

船恐難立時援救疊次函商都興阿黃彬等酌
量分撥船隻以資兼顧都興阿深以爲然但以
水師非其專責轉商黃彬而黃彬總以不妨爲
辭臣等目擊情形實深焦灼查金山爲長江天
險屹立瓜鎮之間實爲天然關鍵如金陵賊船
下駛御河逆艘潛竄均不能越此要津現已調
撥師船設法橫截下竄似可無虞其北岸之船

並應分移南岸各口以堵逆匪偷渡相應請

旨於駐泊北岸之總兵陳國泰吳全美周希濂李德麟
四員中

欽派二員前赴鎮江駐泊歸臣等調遣隨時上下梭巡
肅清江面再將下游北岸防船分移南岸各口
駐守以期周密奏入

上命軍機大臣傳諭都興阿黃彬曰昨因巴棟阿等奏

請專派大員總統下游師船當諭令都興阿等飭總兵吳全美赴下游防勦本日閱巴棟阿馮子材初三日奏報逆匪造成船隻有出江北竄之信江防緊要請飭派駐紮北岸之總兵駐泊鎮江等語逆匪趕造礮划擄民貨船糾集大股意圖出江北竄鎮江以上南岸僅泊師船四十餘隻北岸計有九十餘號停泊各口自金山以達甘露寺江面遼闊僅有賴鎮海所

部師船分布實屬不敷防守設遇警急雖有北岸各處防船終難立時援救巴棟阿屢次函商都興阿等分撥船隻扼守南岸何以黃彬總以不妨爲詞屢催罔應設南岸有失賊勢北趨師船散漫深恐貽誤大局著都興阿黃彬仍遵前旨迅飭吳全美赴下游總統鎮江至江陰一帶師船並於駐泊北岸之總兵陳國泰周希濂李德麟三員內酌量添派並分撥師船

前赴鎮江駐泊歸巴棟阿等調遣上下梭巡以期肅清江面都興阿督辦江北軍務水師亦歸其調度黃彬統帶水師尤屬責無旁貸現在江防緊要捍南卽以衛北務當妥爲布置毋得意存推諉致誤事機

二十七日

甲申

瑞昌王有齡奏言准米興朝咨稱

賊踞永康與金華股匪互爲犄角意在窺犯東陽旁竄甯紹我軍馳抵東邑逐日派隊進攻該

匪與武義之賊一同遁去二十八日會同金華府知府王桐永康縣知縣程陶成帶領兵勇將永康收復永康之賊全股併入金華二十八日卽竄曹宅遊擊曾得勝帶勇在彼紮營衆寡不敵被賊衝散退至孝順鎮又有大股直撲文瑞營盤我軍三次進擊賊仍不退文瑞恐孤軍四面受敵現已退回義烏等語臣等聞信當催吳

再升一軍兼程赴援其藩司林福祥一軍本札
調來省不得不先其所急卽飭繞赴諸暨扼紮
會勦文瑞等亦求救於米興朝當派兵勇七百
人赴義援應米興朝恐義烏有警永康東陽均
隔絕在外不得已撤回二邑之師移紮蘇溪以
堵入紹門戶三十日賊至義烏我軍接仗失利
義烏遂於是日失守米興朝派援義烏之軍與

賊力戰傷亡甚多文瑞所部退往諸暨蘇溪存
兵不及二千軍心大爲搖動其義烏文武各員
下落應俟確切查明再行具奏至文瑞一軍三
千餘人經臣等派赴金華勦匪旣不能滾營前
進又不能互相聯絡迨金華永康之賊合股下
竄卒爲該逆所乘節節退守義烏亦復失陷實
屬驚怯無能姑念其上年冬間有保守杭湖二

郡之功應請

旨將新授處州鎮總兵文瑞革職留任責令防守諸暨
進勦金華以觀後效如仍不知振作再行嚴叅
治罪臣等一面飛飭米興朝吳再升林福祥等
統兵速進相機截勦務保甯紹完善之區奏入
上諭內閣曰浙江處州鎮總兵文瑞經瑞昌等派赴金
華勦匪於該逆合股下竄時節節退守遂致義烏失

陷實屬驚怯無能文瑞著革職留任仍責令防守諸
暨進勦金華賊匪以觀後效如再不知愧奮卽著瑞
昌等嚴叅治罪所有義烏文武各員下落並著查明
具奏

瑞昌王有齡又奏言據署溫處道志勳署處州
鎮總兵特保稟報五月初八日志勳督帶兵勇
由溫起程赴處十四日馳抵廈河正值特保回

自龍泉商撥一軍扼賊由松入處之路據麗水
縣知縣姚復輝稟稱遂昌於初六日失守十一
日松陽繼陷該縣知縣均不知下落處州府知
府李希郊以堰頭爲麗松交界於十二日馳往
駐守不意該逆大股來撲衆寡不敵李希郊登
時陣亡各情志勳等正擬馳往抵禦賊已竄入
城中趕救不及處州府城於十六日失守志勳

特保當卽帶兵同時進攻十七日該逆大股出城撲我厦河營盤另有賊匪乘坐木筏順流下竄水陸各軍分投截擊斬獲長髮首級數十顆是夜環城進攻未敢收隊十八日派兵由僻境繞至城下特保督同遊擊陳萬景等由大南門進剿姚復輝督帶練勇從旁夾擊該逆由北門遁走向桃花嶺一路而去卽於是日將處州府

城克復等語復探處州之賊逃往縉雲是否失
守尙無實信惟縉雲緊接永康賊必歸併處屬
以爲金蘭聲援惟有速拔金蘭方可以次掃蕩
臣等前以處屬毗連閩省曾咨商福建督撫臣
迅撥勁旅入處會剿茲准慶端來咨已派遣員
張啟煊統領各軍由松溪取道馳赴處州金華
一帶會同浙師剿辦又派已革道員馮聘之管

帶弋陽勇二千名隨後繼進現在處州已復賊
多下竄卽飭繞赴下游會同饒廷選張玉良等
力圖攻克金蘭其松遂二縣曾否收復容俟確
查具奏至溫處二郡防堵事宜仍責成溫處鎮
道體察情形分別籌辦查署溫處道志勳署處
州鎮總兵特保於處州失陷本有應得處分惟
兩日之間卽鼓勵兵勇迅復城池功過尙足相

抵合無仰懇

聖恩免其查辦麗水縣知縣姚復輝隨同克復懇

恩免其治罪仍革職留任以觀後效其餘文武各員容

查明分別辦理處州府知府李希郊以二千未

練之勇禦數萬方張之賊力竭陣亡實屬無虧

大節應請

飭部從優議卹以慰忠魂奏入

上諭內閣曰浙江遂昌松陽縣城於五月初六十一等
日先後被匪竄陷處州府知府李希郊馳往堰頭堵
剿以衆寡不敵力竭陣亡處州府城於十六日失守
署溫處道志勳會同署總兵特保督兵進攻十八日
卽將處州府城克復著瑞昌等嚴飭帶兵各員跟蹤
追剿速復各城毋稍延緩浙江署溫處道志勳署處
州鎮總兵特保於處州失守後鼓勵兵勇迅復城池

功過尙足相抵均著免其查辦隨同克復城池之麗
水縣知縣姚復輝著改爲革職暫行留任其餘文武
各員著瑞昌王有齡查明具奏處州府知府李希郊
禦賊陣亡殊堪憫惜著交部從優議卹以慰忠魂

二十九日
丙戌瑞昌王有齡奏言據湖防局道員

趙景賢稟稱自賊竄長興西鄉之八九兩都民
團已被衝散合溪又爲賊踞與甯廣聯成一片

惟東西川等處尙在固守而東鄉之陳橋官莊
各團均有練勇槍船足以扼其東面該逆防我
進攻在南路虹星橋等處築卡堵禦其時烏鎮
平望之賊屢次內竄郡城無兵可調計惟夾浦
一軍由北路而進乘賊不備可期得手因飭駐
防都司江振聲等相機辦理湖州府知府瑞春
復飭長興縣知縣陳徽章等互相策應四月十

七至二十四等日該逆約四五千由長興出
優圖犯夾浦經官軍疊次攻擊斃賊甚多二十
八九等日復由東門竄出經江振聲等連日鏖
戰斃賊數百五月初四日該逆又分三股直犯
夾浦江振聲令將礮船駐紮大烏橋堵禦首先
轟斃黃衣賊目一名賊匪數十名奪獲划船八
隻賊衆遁回長興城內初七日趙景賢令同知

潘懿督軍赴虹星橋一帶並令夾浦各營以五
成駐守夾浦以五成進剿長興初九日江振聲
陳徽章督率兵團同時並進並令各船分路設
伏該逆不意我軍猝至四散奔逃我軍奮勇追
殺殲斃數百名落水淹斃者甚衆追至小東門
外一擁登城賊向大東門大西門竄出其不及
出城者我軍斬殺淨盡立將長興縣城克復是

日虹星橋卡亦經我軍踏平至盤踞烏鎮之賊
先於四月十一日經屍舍驥村各國局糾集槍
船三百餘號會同礮船進剿將東西南三柵攻
破殺賊數百名二十五日平望震澤之賊來犯
南潯復經局董閔希濂等調集槍船合擊斃賊
不少現在練市一帶已飭舉辦團練並令與湖
郡毗連各國互相聯絡以期規復平望等情查

賊匪竄踞長興外連甯廣內通安孝實爲湖郡
腹心之患賴夾浦一軍連戰皆捷得以克復堅
城此次出力之營員弁勇紳董團丁及陣亡各
員應由臣等查明分別奏請獎卹署長興縣知
縣陳徽章力戰克復城池功過尙足相抵可否
免議失守處分出自

上諭內閣曰浙江賊匪自竄陷長興後在南路虹星橋等處築卡出擾圖犯夾浦經兵團疊擊斃賊甚多五月初九日都司江振聲等水陸並進將長興縣城克復虹星橋賊卡亦一律踏平其盤踞烏鎮撲犯南潯之賊復經團練擊敗辦理尙屬得手此次出力員弁紳董團丁及陣亡各員著瑞昌等查明奏請獎卹署長興縣知縣陳徽章雖隨同克復城池究有應得之

啓著革職暫留署任

瑞昌王有齡又奏言探報金華之賊本月初六日復出擾山口曹宅等處民團猝不及防連失營盤數座旋即擊退文瑞一軍已於初六初七等日先後馳抵義烏卽日拔隊前進與民團合力攻剿江西餘匪復由江山竄至湖山村與遂昌偪近聲稱欲由松陽竄雲永康等縣併竄金

華其壽昌之賊初五日竄過小番嶺經張玉良
派隊進攻立棄小番嶺而去不意初十日復乘
虛竄入直達江口欲與蘭賊通連蘭賊亦屢出
竄擾經水師礮船並參將羅大春一軍擊敗查
賊匪由金赴蘭絡繹不絕刻下情形蘭谿尤爲
喫重且徽州股匪一由昌化竄至東源富山等
處一由績溪威坪竄入淳安縣城嚴州防兵不

及三千殊形危急賊若不犯嚴城必先歸併壽
昌勾結蘭賊再圖下竄張玉良一軍水陸兼防
腹背受敵且與民團不和能否得力尙未可知
衢州隔絕在外文報罕通林福祥自抵弋陽絕
無消息李元度尙在西省更覺遙遙無期不得
已咨商饒廷選酌帶小隊七八百人前赴蘭谿
一帶聯絡諸軍力圖堵剿第省城兵勇愈單萬

一有警何以當之前據署江蘇藩司吳興稟稱
蘇州逆匪竄伺杭湖甯紹等處派四僞王各率
一類一由江西一由徽州一由嘉興一由湖州
進期在必得等語現在僞侍王李逆僞輔王
楊逆果自江西徽州廣德各路分竄浙疆雖石
門平湖之賊尙未深入長興克復湖州亦得解
嚴然逆蹤飄忽靡常殊難豫料至該逆垂涎甯

紹已非一日現旣偏近紹興臣等因王履謙請
派運司莊煥文前往督辦防務故令其統率閩
兵閩勇八百餘名赴紹嗣據莊煥文稟稱王履
謙以該處民畏客兵無庸在郡駐紮請卽撤回
適值饒廷選赴蘭省城正在需兵兼防浙西有
警當調莊煥文彭斯舉等同省其紹興防守事
宜應由王履謙督同府縣籌辦

同日薛煥奏言臣前因已革總兵米興朝回浙
卽調駐防諸翟鎮之參將梁安邦前往金山衛
城填紮並因署提臣曾秉忠赴三官堂督勦平
湖竄賊督令副將李恆嵩移營北簕山等處規
復青浦詎嘉定等處逆匪乘我軍移營未定同
時撲犯緣諸翟抽調梁安邦一軍後僅有參將
梁勝章帶勇六百名駐守臣飭參將王國安帶

兵填紮梁安邦甫於五月十二日申刻起程而嘉定之賊已於巳刻衝出四面圍撲相持三時之久始退至附近村莊是日戌刻王國安帶兵趕到臣又派守備吳永敖星夜馳援復飭臬司湯雲松督同上海縣知縣劉郇膏前往調度十四日賊在紀王廟焚掠湯雲松料必復犯諸翟卽與梁勝章會商出隊另遣已革把總劉興邦

帶隊設伏於紀家橋正調派開大股賊匪四五
千人蟻擁而來梁勝章等誘至紀家橋伏兵突
起該逆驚潰向嶠龍鎮竄去十六日追抵嶠龍
鎮擊斃甚多餘匪仍竄嘉定城中署提臣曾秉
忠於五月初十日在明珠菴擊賊獲勝賊由廣
陳退回平湖後復於十三十四等日竄至明珠
菴呂港一帶勢將抄襲張堰後路以犯金山衛

城曾秉忠派遊擊徐嶸等分路夾攻斃匪無算
生擒二十一名擊沈賊船二十餘隻賊向廣陳
新倉竄去其時曾秉忠派赴青浦之守備曾敏
行亦將朱家角賊卡攻毀逼近青浦縣城與副
將李恆嵩水陸各營互相聯絡十三日青浦大
股逆匪衝出東門撲犯北幹山之營李恆嵩率
隊迎敵陣斬黃衣賊目二名斃賊一百餘名十

四日東西二門出賊二千餘人嘉定復來援賊
三四千人分犯陳坊橋北斡山營盤我軍接戰
竟日殺斃百餘名十六日又有馬賊數百從東
門竄出並有礮船槍船十一隻齊至桐石村我
軍水陸夾擊斃匪不少擊沈槍船一隻該逆敗
奔後仍於城外築卡阻我進兵嘉定援賊亦尙
踞方家窰一帶牽掣我師李恆嵩督軍往剿該

逆盡退入城其方家窰之賊亦竄回嘉定刻下
各路竄匿雖已回巢但金山衛城防軍單薄恐
該逆再來撲犯力不能支臣現飭副將滕嗣林
添募勇丁用資控扼並飭各營隨時相機堵剿
迅圖克復均奏入報